



Arartekoaren ebazpena, 2011ko abuztuaren 12koa. Horren bidez, Arabako Foru Aldundiaren Gizarte Zerbitzuen Sailari gomendatzen zaio eraginik gabe utz ditzala etxebizitzako gastuetarako prestazio osagarriaren etetea eta forma akats larriengatik behar ez bezala eskuratutako kopuruak itzuli beharragatik sortutako zorra.

Aurrekariak

1. Kexagileak Etxebizitzako gastuetarako Prestazio Osagarri bat (EPO) jasotzen du. Prestazio hori 2010eko azaroaren 25eko ebazpenaren bidez eten zitzaion, eskatu zitzaionean alokairu ordainagiriak ez aurkezteagatik. Etetea atzera eraman zen urtarrilaren 1era, eta ondorioz behar ez zirela kobratutako zenbatekoengatik 3.200 euroko zorra sortu zen.
2. Kexagilearen kexaren arrazoia da Arabako Foru Aldundiak ez ziola jakinarazi alokairu ordainagiriak San Antonio kaleko 10.eko Gizarte Prestazioei buruzko Informazio eta Izapidetze Udal Bulegoan aurkeztu behar zirela. Prestazioaren emate-ebazpena jakinarazteko idazkian adierazitako jarraibideei jarraituz, bere oinarrizko gizarte zerbitzura jo zuen aipatu agiriak ematera. Bertan, jakinarazi zitzaion izapidetzeko moduaren aldaketa bat zela-eta, ordainagiri horiek beste leku batean eman behar zirela eta garaiz jakinaraziko zitzaiola. Jakinarazpen horren ordez, azaroaren 25eko ebazpen idazkia jaso zuen; haren bidez prestazioa eten zitzaiola eta 3.200 euroko zorra sortu zela jakinarazi zitzaion.
3. Horri buruzko argibideak eskatu ondoren, Arabako Foru Aldundiak honakoa jakinarazi zigun: *"...asimismo, se le comunica la obligación, de presentar semestralmente los justificantes de los gastos de alquiler de la vivienda o alojamiento habitual, ante su servicio social de base"*.

Bestalde, behar ez bezala eskuratutako kopuruen itzulketa erreklamatzeko espediente berri bat hasteko orduan egiten diren izapideak ere ardua zaizkio Arartekoari, etxebizitza gastuetarako prestazio osagarriari buruzko 2/2010 Dekretuaren IV. kapituluko artikulua betetzeko.

Gogoetak

1. Kexagileak emandako agirietan eta Arartekoak egindako informazio eskaerari emandako erantzunean bertan adierazitakoaren arabera, EPOaren emate-ebazpenean zehazten da ordainagiriak oinarrizko gizarte zerbitzuan eman beharko direla. Horrela egiten zen lehenago GLL batengatik ordaintzen zizkioten alokairu gastuak justifikatzeko, 2/2010 Dekretua indarrean sartu aurretik.



Ordainagiriak eman behar hori Dekretuko 19.1 artikulua xedatzen du: *"Emate-ebazpenari dagokionez, Etxebizitzako Gastuetarako Prestazio Osagarriaren titularrak sei hilean behin ohiko etxebizitzaren edo bizitokiaren alokairu-gastuen frogagiriak udalerriko oinarrizko gizarte-zerbitzuari aurkeztu beharra ezarriko da. Frogagiri horiek ordainagiri pribatuak, fakturak, edo banku-ordainketako frogagiriak izan daitezke"*.

Alokairuen ordainagiriak San Antonio kaleko bulegoan eman behar zirela ez zen behar bezala jakinarazi eta, horregatik, Arabako Foru Aldundiak erabaki du kexagileak eteteko arrazoi bat bete duela (Dekretuko 24.1.a artikulua), ordainagiriak bai EPO emateko ebazpenean bai araudian bertan ezarritako xedapenen arabera aurkeztu arren. Hots, ordainagiriak oinarrizko gizarte zerbitzuan behar bezala aurkeztu arren, haiek ez ziren onartu esan baitzitzaion beste leku batean eman beharko zirela, eta leku hura garaiz kanpo jakinarazi zitzaion, eteteko prozedura amaitu ondoren, zegozkion alegazioak aurkezteko aukerarik egon gabe.

Horrekin batera, entzute izapiderik ere ez zen egin, eta hala egin izan balitz, kexagileak alokairuen ordainagiriak aurkeztu zitzakeen, etendura saihestuz horrela.

2. Aldundiari inguruabar horretaz galdetuta, honakoa esan digu alegazioetarako epea zabaldu beharri buruz: *"...Ez betetze horrek ez du entzuteko izapiderik behar; agiri horiek aurkeztu beharra Etxebizitzako gastuetarako Prestazio Osagarriaren emate-ebazpenean jakinarazten zaielako titularrei"*.

Zentzu horretan, ez gatoz bat Arabako Foru Aldundiak entzuteko izapidera deitzeko beharrik ezari buruz dioenarekin, EPO arautzen duen legeak berak horrela xedatzen duelako. Zehazki, 2/2010 Dekretuko 31.2 artikuluan: *"Etxebizitzako Gastuetarako Prestazio Osagarria jasotzeko eskubidea aldatzeko, eteteko edo azkentzeko prozedura hasitakoan, ofiziozko prozedura bat bada, hasiera eman zaiola jakinaraziko zaio titularrari adieraziriko bizilekura igorrita, eta baita ere prozedurak oinarri dituen arrazoiak eta izan ditzakeen ondorio ekonomikoak -33. artikuluan ezarritako epean berariazko ebazpenari ezak eragindakoak-, eta ebatzi eta jakinarazteko epea eta administrazioaren isiltasunaren ondorioak, eta horiek guztia interesdunek egokitzat jotzen dituzten alegazioak egin ditzaten"*. Halaber, garrantzitsua da Herri Administrazioen Araubide Juridikoaren eta Administrazio Prozedura Erkidearen 30/1992 Legeko xedapenak aintzat hartzea, 84. artikuluko 1 eta 2. paragrafoetan honakoa xedatzen baitu: *"Prozedurak bideratu ondoren, eta ebazpen proposamena idatzi aurretik, interesdunei edo, dagokionean, beren ordezkariari prozeduren berri emango zaie, beti ere, 37.5. artikuluan jasotako informazioak eta datuak salbuetsiz. Interesdunek gehienez hamabost egun dituzte eta gutxienez hamar, egoki irizten dieten dokumentu eta egiaztapenak alegatzeko"*.





Beraz, uste dugu 30/92 Legeko 62.1.e artikulua aplikatu behar litzatekeela: *"1. Erabat deusezak izango dira herri-administrazioen egintzak baldin eta(...)Legez ezarritako prozedura erabat alde batera utziz edo kide anitzeko organoek erabakiak hartzeko funtsezko arauak guztiz bazterturik eman badira".*

3. Bestalde, 2/2010 Dekretuko IV. kapituluko xedapenak betez behar ez zirela kobratzeagatiko espediente berria zabaltzeko betetako izapideei buruzko argibide eskaerari erantzunez, zorra sortu izana etete ebazpen beraren bidez jakinarazi zitzaiola onartu da. *"La Diputación Foral de Álava y tal como refrenda la normativa -artículo 33 del Decreto 212010 de 12 de enero de desarrollo de la prestación complementaria de Vivienda- realiza la correspondiente resolución de suspensión motivada. En la misma se notifica la deuda generada que asciende a 3.200.-€ por cobros indebidos y la forma de compensación de la misma".*

Beraz, gure ustez, horri ere 30/92 Legeko 62.1.e artikulua aplikatu behar litzaioke.

Horregatik guztiagatik, gomendio hau egiten dugu, otsailaren 27ko 3/1985 Legeak –erakunde hau sortu eta arautzekoak– 11 b) artikuluan ezarritakoaren arabera:

33/2011 GOMENDIOA, abuztuaren 12koa, Arabako Foru Aldundiko Gizarte Zerbitzuen Sailari egina

Etxebizitza Prestazio Osagarria etenda egon den bitartean, kopurua kobratzeko eskubidea eduki duela aitortzen da.

Behar ez zirela jasotako zenbatekoak kobratzeak sortutako zorra baliorik gabe utz dezan eta Diru-sarrerak Bermatzeko Errentagatik jasotzen duen zenbatekotik kenduz ordainarazi zaion zenbatekoa itzul diezaion.

